

Headlines

1. लेफिटनेंट गवर्नर मनोज सिन्हा होरें कल राजभवन च बिहार दिवस आहले समारोह च हिस्सा लैता। उ'नें आखेआ जे प्राचीन काल थमां गै बिहार गी आध्यात्मिकता, समृद्ध इतिहास ते सगोसार संस्कृति लेई जानेआ जंदा रेहा ऐ।
2. एलजी सिन्हा होर अज्ज जम्मू दे अभिनव थेंटर च तवी फिल्म—महोत्सव 2025 दा उद्घाटन करडन।
3. विधानसभा दे स्पीकर अब्दुल रहीम राथर होरें जल जीवन मिशन च कथित बेजाब्तगिएं दी जांच लेई हाउस कमेटी दा ऐलान कीता ऐ।
4. बालटाल थमां श्री अमरनाथ जी दी पवित्तर गुफा तोहड़ी रोप—वे दे निर्माण लेई तफसीली प्रोजेक्ट रिपोर्ट तैयार करने गितै बोलियां मंगियां गेइयां न।
5. समूलचा राष्ट्र, स्वतंत्रता संग्राम दे म्हान क्रांतिकारिएं शहीद—ए—आज़म भगत सिंह, राजगुरु ते सुखदेव होरें'गी श्रद्धांजलि अर्पित करै करदा ऐ।

<><><><><><>

LG-Bihar(byte)

उपराज्यपाल मनोज सिन्हा होरें बिहार दिवस समारोह च हिस्सा लैता। इस कार्यक्रम दा सरिस्ता राजभवन जम्मू च कीता गेआ। आकाशवाणी जम्मू संवाददाता दी रिपोर्ट मूजब उपराज्यपाल होरें इस मौके पर बिहार दे लोकें गी शुभकामनां दित्तियां। उनें आखेआ जे प्राचीन समें थमां गै बिहार आध्यात्म, समृद्ध इतिहास ते संस्कृति दा केन्द्र रेआ ऐ। मगाधा बिहार दी प्रमुख थाहर ही, जिसी शिक्षा ते संस्कृति दा केन्द्र आखेआ जंदा हा। उनें आखेआ.....बाईट किट्टे गी संबोधत करदे होई उपराज्यपाल होरें बिहार दी सांस्कृतिक शैखिणक ते आध्यात्मिक विरासत गी उजागर कीता। उनें बिहार राज्य दी महान शख्सीयतें गी नमन कीता ते मुख्य दे विकास च उंदे योगदान गी उजागर कीता।

<><><><><><>

LG-Filmotsav

उपराज्यपाल मनोज सिन्हा होरें अज्ज अभिनव थेंटर जम्मू च जम्मू कश्मीर साईन एसोसिएशन आस्सेआ आयोजित तवी फिल्मोत्सव दा उद्घाटन करगन। आकाशवाणी जम्मू संवाददाता दी रिपोर्ट मूजब एहदा मकसद फिल्म निर्माताएं, कलाकारें ते रचनात्मकता कन्नै जुड़े दे पेशेवर लोकें गी अपना हुनर दस्सने लेई इक मंच उपलब्ध करोआया ऐ। अज्ज आले इस उद्घाटन समारोह च केई मनने परमन्ने दे लोक शामिल होंगन। जेकेसीए आस्सेआ नियुक्त जजें दा पैनल फिल्में दा आंकलन करोग ते नतीजे दी घोषणा बी अज्ज गै कीती जाग। जेतू गी 10 जहार रपे, फर्स्ट रनर—अप गी 7 जहार ते सैकंड रनर—अप गी 5 जहार रपे दित्ते जांगन।

<><><><><><>

Speaker-House Cammittee

जम्मू कश्मीर विधानसभा दे स्पीकर अब्दुल रहीम राथर होरें जम्मू कश्मीर च जल जीवन मिशन दी अमलावरी च कथित तौर पर अनियमिताएं दा पता लाने लेई हाउस कमेटी बनाने दी घोषणा कीती। स्पीकर होरें आखेआ जे बजट सत्र शुरू होने थमां गै केइ सारे विधायक गिस कमेटी खडेरनेदी मंग करा'रदे हे। उनें आखेआ जे सदन सब्बने थमां उप्पर ऐ ते जल जीवन मिशन दी कथित अनियमिताएं दा पता लांदे होई हाउस कमेटी खडेरने दी गल्ल मन्नी लैती ऐफ।

<><><><><><>

CS-Kala Kendra

मुख्य सचिव अटल डुल्लू होरें आखेआ ऐ जे जम्मू कश्मीर च कला केन्द्र गी परफारमिंग ते विजुअल आर्ट्स दा प्रमुख केन्द्र बनाया जाग। उनें सरकार दी इस भेठा वचनबद्धता गी बी जाहर कीता। उनें जम्मू कश्मीर लेई पूरी पराती ते खरी चाल्ली कन्नै व्याख्या कीती गेदी सांस्कृतिक नीति गी बी उजागर कीता। कला केन्द्र जम्मू च तवी उत्सव 2025 दे सरबंघे च

आयोजित कार्यक्रम गी संबोधत करदे होई उनें एह गल्ल आक्खी। एहदा आयोजन जम्मू कश्मीर दी कला संस्कृति ते भाषा सरबंधी अकादमी ते अमर महल मयूजियम ते लाइब्रेरी जम्मू आस्सेआ कीता गोआ। मुख्य सचिव होरें दस्सेआ जे खित्ते दे कलाकारें, लेखकें ते नेह होरने गी प्रोत्साहित करने लेई अवार्ड स्कीम गी खीरी रूप दित्ता गोआ ऐ।

<><><><><><>

Cong Statehood Movement

जम्मू-कश्मीर प्रदेश कांग्रेस कमेटी, जम्मू-कश्मीर दा राज्य दा दर्जा ब्हाल करने दी मंग गी लेइयै जम्मू शैहरा च 6एं दिनें दा इक अभियान चलाग। औंदी 24 अप्रैल शा लेइयै 29 अप्रैल तोहड़ी चलाए जाने आहले इस अभियान दे तैह्त मरहलेवार ढंगै'ने बक्ख-बक्ख इलाकें थमां संझा'लै मार्च कड्डे जाडन। आकाशवाणी दे जम्मू संवाददाता दी रिपोर्ट मूजब, प्रदेश कांग्रेस कमेटी दे प्रधान तारिक हमीद कर्फा होरें आखेआ ऐ जे उं'दा एह अभियान 'हमारी रिआसत-हमारा हक' दा नारा बुलंद करने दे कन्नो-कन्नी जय बापू, जय भीम, जय संविधान दे अभियान गी बी बल देग। कर्फा होरें आखेआ ऐ जे जम्मू-कश्मीर दा रिआसत दा दर्जा ब्हाल करने गी लेइयै कांग्रेस पार्टी अपना संघर्ष बरोबर जारी रक्खोग कीजे एह जम्मू-कश्मीर दे हर इक बसनीक दी मंग ते अधिकार बी ऐ।

<><><><><><>

Ropeway Bids

सरकारै अज्ज आखेआ ऐ जे जम्मू-कश्मीर च त्रै महत्वपूर्ण रोप-वे परियोजनाएं दे निर्माण लेई तफसीली प्रोजेक्ट रिपोर्ट तैयार करने गितै बोलियां मंगियां गेइयां न। इ'नें रोप-वे परियोजनाएं च बालटाल थमां 3 ज्हार 880 मीटर दी उंचाई पर स्थित श्री अमरनाथ जी दी पवित्तर गुफा तोहड़ी 11 इशारिया 6 किलोमीटर लम्मा रोप-वे बी शामिल ऐ जेहदा मकसद श्री अमरनाथें दी जात्तरा गी मता सखल्ला बनाना ऐ। आकाशवाणी दे जम्मू संवाददाता दी रिपोर्ट मूजब, त्रै होर रोप-वे परियोजनाएं लेई नेशनल हाईवेजस लॉजिस्टिक्स मैनेजमेंट लिमिटेड आसेआ तफसीली प्रोजेक्ट रिपोर्टें दे निर्माण लेई बी बोलियां मंगियां गेइयां न। इ'दे चा 2 रोप-वे प्रोजेक्ट बडगाम च ते इक रामबन जिले च होग। मुख्यमंत्री ओमर अब्दुल्ला होरें कल विधानसभा च इक सोआलै दे लिक्खियै दित्ते गेदे परते च एह जानकारी सांझी कीती। ओमर हुंदे कश सैलसफा मैह्कमे दी बी जिम्मेदारी ऐ ते उ'नें एह जानकारी नेशनल कांफ्रेंस दे विधायक सज्जाद शाहीद हुंदे आसेआ पुच्छे गेदे इक सोआलै दे परते च दित्ती। मुख्यमंत्री होरें इब्बी दस्सेआ जे जम्मू-कश्मीर च विकास-बाददे लेई 52 रोप-वे परियोजनाएं दी इक सूची सरकार आसेआ सांझी कीती गेदी ऐ।

<><><><><><>

Martyrs Day

स्मूलचा मुख्य अज्ज भारत दी अजादी दे संघर्ष दे त्रै क्रांतिकारिणें, शहीद-ए-आजम भगत सिंह, शिवराम राजगुरु ते सुखदेव थापर होरें गी श्रद्धांजलि देआ करदा ऐ। भारत माता दे इनें त्रऊं वीर सपूतें गी 1931 च अज्जै दे रोज लाहौर दी मरकजी जेल च फांसी देई दित्ती गेई ही। इनें महान सुतंत्रता सैनानिणें गी 17 दिसम्बर 1928 गी लाहौर च अंग्रेज पुलस अफसर जे. पी.सॉन्डर्स दी हत्या दे आरोप च मौत दी सजा सनाई गेई ही। उंदे चेते हर ब'रे अज्जै दे रोज यानि 23 मार्च गी उंदे सम्मान च श्रद्धांजलि समारोहें दा सरिस्ता करियै उंदिणें कुर्बानिणें गी चेता कीता जंदा ऐ।

<><><><><><>

Ramban-HADP

रामबन च बागवानी सेक्टर अच्छा प्रदर्शन करा'रदा ऐ ते केन्द्र शासत प्रदेश दे आर्थिक विकास दा केन्द्र बना'रदा ऐ। राई-बाई दे पूरे पराते विकास सरबंधी प्रोग्राम एचएडीपी तैह्त इक व्यापक कार्यक्रम रामबन दे राई मैह्कमा आस्सेआ शुरू कीता गोआ ऐ। राई-बाई सरबंधी बजारें दे विकास करसाने, उपभोक्ताएं दे हितें आली नीतिणें दी राखी करना, कार्यक्रम ते म्यार ते मानक कायम करने सरबंधी जतन कीते जा'रदे न। मैह्कमे आस्सेआ केन्द्र ते प्रदेश सरकार कन्नै नीतिणें ते कार्यक्रमें दी अमलावरी आस्तै नेडमां तालमेल बनाइयै कम्म कीता जा'रदा ऐ। होर जानकारी दिंदे होई रामबन दे बागवानी मैह्कमे दे एरिया मार्किटिंग अफसर तेहसीन इकबाल चिब होरें आखेआ

<><><><><><>

Udh Nasha Mukt

नशा मुक्त भारत अभियान दे तैहत्त समाज कल्याण विभाग आसेआ जम्मू-कश्मीर पुलस ते उधमपुर जिला खेड्ड दफतर दे सैहयोग कन्ने उधमपुर आह्ले सरकारी आईटीआई कॉलेज च नशे दी माड़ी कवैतू शा बचाऽ बारै इक ध्याड़े दे जागरूकता कार्यक्रम दा सरिस्ता कीता गेआ। इस पैह्लकदमी दा मकसद विद्यार्थिएं ते शैक्षिक अमले गी नशीले पदार्थे दे खतरें ते इंदी लत्त छोड़ने च मदाद हासल करने दे महत्व बारै जागरूक बनाना हा। कार्यक्रम दरान विद्यार्थिएं आसेआ बक्ख-बक्ख गतिविधिएं च शमूलियत कीती गई जिंदे च वॉलीबॉल मैच, चित्तरकारी मुकाबला ते वाद-वाद आह्ला मुकाबला बी शामिल हा। मगरा इनें सम्मनें प्रतिभागिएं नशा मुक्त भारत दी सगंध बी चुक्की।

<><><><><><>